



CONCLUSIÓNS

do equipo autor deste informe

Primeira. O PIB de Galicia baixou en 2013 un 1%, (na media estatal 1,2%). Ampliouse o diferencial de Galicia e España coa Unión Europea, que tivo un crecemento económico (0,1%).

Por ramas de actividade produtiva, o mellor comportamento en 2013 produciuse en Galicia no sector industrial (suba do 1,9%) e o peor, un ano máis, na construción (-4,1%).

No conxunto do último quinquenio, de forte crise económica, só dúas comunidades autónomas (Navarra e Madrid) tiveron un comportamento do PIB mellor que o de Galicia.

Segunda. O comercio internacional de Galicia presentou un gran dinamismo. En 2013 o valor das nosas exportacións ao estranxeiro subiu un 10,5%, mentres que o das importacións baixou un 4,4%. Como consecuencia, a balanza comercial internacional de Galicia rexistrou un superávit que foi máis do dobre que no ano anterior.

No que se refire ao comercio intraestatal, Galicia quedou no ano 2013 cun déficit de 3.194 millóns de euros, inferior ao do ano 2012 (3.822 millóns de euros).

Terceira. A taxa de inflación de Galicia en 2013 foi a menor da última década (0,5%) aínda que quedou dúas décimas por riba da media española. O grupo de gasto en tabaco e bebidas alcohólicas foi o de maior suba porcentual dos prezos en Galicia (5%) e o de comunicacións o de maior diminución (-6,6%).

Cuarta. A pegada da crise económica pódese ver coa evolución dos índices de benestar. Os datos oficiais reflicten, entre outras variables, que hai máis de 63.000 fogares galegos con poboación infantil en risco de pobreza; xa que logo, unha de cada catro familias de Galicia nas que hai menores non dan cuberto as súas necesidades básicas pola falla de recursos. As provincias de Pontevedra e A Coruña teñen as maiores taxas de pobreza infantil e a de Lugo a menor.

Quinta. De acordo cos datos do Directorio Central de Empresas do INE, se ben decreceu por quinto ano consecutivo o número de empresas nas catro provincias galegas, o fai en menor medida que o conxunto estatal. As empresas galegas diminúen ó inicio de 2013 en 1.513 –cun decaemento do 0,77%, con respecto ó ano anterior–, representando o 6,13 % do total estatal e sendo a quinta comunidade autónoma en número de empresas, das que ao redor da metade non teñen asalariados.

Segundo a súa condición xurídica, en Galicia hai 64.613 sociedades de responsabilidade limitada, 3.485 sociedades anónimas, 5.906 comunidades de bens, e 106.274 empresas baixo a titularidade de persoa física.

Sexta. O gasto en I+D de Galicia supón para o ano 2012 (último dato dispoñible) o 0,87% do PIB, catro centésimas menos ó do ano anterior; lonxe da media estatal española (1,30) que diminúe anualmente tres centésimas.

Sétima. Galicia conta con 45 novas sociedades laborais inscritas no 2013. Delas son persoas socias traballadoras 192 e 30 persoas socias capitalistas. Estes resultados mostran unha liña descendente en número de sociedades e traballadores respecto do exercicio do ano anterior.

Galicia ocupa o octavo lugar de España en número de sociedades laborais (en 2012 ocupaba o quinto), o que representa un 17% do número total das sociedades laborais de España. No ámbito de Galicia tanto o maior número de sociedades, como o de socios corresponden a Pontevedra (22 SL; 135 socios) que ten un enorme crecemento respecto o exercicio do 2012, seguida de A Coruña (18 SL; 64 socios), Ourense (3 SL; 16 socios) e Lugo (2 SL; 7 socios).

En canto ás sociedades cooperativas, constituíronse no 2013 60 sociedades en Galicia, un número superior ao do ano 2012 (51 cooperativas). A distribución de socios segundo o seu sexo é de 243 homes e 139 mulleres.

Oitava. A diminución do emprego en Galicia no ano 2013 segundo a EPA foi dun 3,8%, máis do triplo da media estatal (-1,2%).

A poboación asalariada galega que traballa a tempo parcial tivo un forte incremento: en 2013 medrou máis que no conxunto do bienio 2011-2012.

Novena. A poboación desempregada subiu lixeiramente en 2013 en Galicia (400 persoas) mentres que baixou un 1,2% no conxunto do Estado.

A taxa de desemprego de Galicia creceu sete décimas porcentuais en 2013 e baixou en catro décimas a española. Segue sendo menor en Galicia, pero reduciuse o diferencial respecto do ano anterior.

Décima. Os datos do paro rexistrado reflicten un descenso do 2,85%. No conxunto de España a redución chegou ó 3,13%.

A taxa de paro rexistrado alcanza o 20,99% en 2013, presentando un peor comportamento no caso das mulleres, chegando ó 22,72%, fronte ó 19,47% do colectivo masculino. Por idades, os peores resultados preséntanse no grupo de menores de 25 anos, cunha taxa de paro do 23,79%.

Por sectores de actividade, é no sector servizos onde máis demandantes de emprego se concentran, superando á suma de agricultura e pesca, industria, construción e sen emprego anterior.

Décimo primeira. Mantense unha maior representación dos homes na contratación (52,72%) fronte ás mulleres (47,28%), unida a un maior uso dos contratos temporais, dos contratos a tempo parcial (no 2013 o eventual por circunstancias da produción a tempo parcial superou ó de xornada completa) e un menor concerto de contratos indefinidos, chegando en 2013 ó 48,15%.

Compre destacar que seguen existindo modalidades contractuais feminizadas como a de interinidade (70,10%), e a de prácticas volve a superar ós concertados con homes. O sector servizos e ocupacións como empregada administrativa e traballadoras de servizos de restauración, persoais e de comercio manteñen a maioría feminina.

Décimo segunda. Polas características do emprego das mulleres (máis traballo a tempo parcial, inferior representación en postos altos, menor antigüidade media, maior temporalidade, categorías menos retribuídas altamente feminizadas etc.), as mulleres galegas percibiron un salario medio anual un 23% inferior ó do home, e o 35% das mulleres galegas tiveron ingresos iguais ou inferiores ó Salario Mínimo Interprofesional.

O importe medio das prestacións por desemprego percibidas polas mulleres galegas foi o 80% das prestacións percibidas polos homes. Do mesmo xeito, as pensionistas galegas só percibiron como media o 73% das pensións do grupo de homes.

Décimo terceira. As excedencias para o coidado de familiares foron solicitadas por mulleres no 82% dos casos. Porcentaxes similares se dan nas excedencias por coidado de fillo/a (94% de mulleres). Do total de persoas que realizan un traballo a tempo parcial por coidado de nenos e nenas e adultos enfermos, persoas con discapacidade ou maiores, o 98% son mulleres.

Décimo cuarta. No ano 2013 produciuse un incremento das contratacións acadándose os 707.044 contratos. Do total de contratos rexistrados, o 92,4% o foron baixo unha modalidade de duración temporal, e só o 7,6% o foron de xeito indefinido.

A modalidade contractual máis utilizada segue sendo o contrato eventual por circunstancias da produción (43% dos contratos iniciais). En segundo lugar se atopa o contrato de obra ou servizo determinado (37% dos contratos iniciais). Tendo en conta a xornada, o máis salientable foi o aumento da contratación a tempo parcial, acadando o 36,7% en 2013.

A temporalidade no sector privado acadou o 22,6% no colectivo masculino e o 25% no feminino. No sector público situouse nun 16% e un 20% segundo foran homes ou mulleres. A rotación dos asalariados galegos foi de 4,17 contratos eventuais por cada traballador e a rotación das asalariadas galegas acadou os 3,33 contratos.

Décimo quinta. Con datos da Seguridade Social, no ano 2013 diminúe globalmente en máis de 1.000 a cifra de empresas en alta. Resáltase que, en Galicia, máis do 89% das empresas teñen menos de 10 traballadores/as, así como a ocupación elevada de persoas traballadoras en empresas cuxa titularidade corresponde a persoas xurídicas. Galicia conta no 2013 con 649.600 persoas afiliadas ao réxime xeral da Seguridade Social, e 213.900 persoas afiliadas ao réxime especial de traballadores autónomos.

Décimo sexta. Continúan a facerse patentes os efectos da crise en 2013 e o número de afiliados/as á Seguridade Social diminúen en media anual en 23.800, tras a baixa de 42.800 en 2009, 22.200 en 2010, 27.300 en 2011 e 39.100 en 2012. Os 917.400 afiliados en alta, en media anual, representan o 5,63% do total dos afiliados do Estado.

Décimo sétima. A relación persoas activas / persoas pasivas no sistema da Seguridade Social ven a afondar en 2013 o signo negativo: maior incremento das persoas perceptoras de prestacións en relación coas persoas afiliadas, producíndose en Galicia unha diminución de 5 centésimas e pasando a representar 1,24 cotizantes por pensionista, fronte ó 1,80 do conxunto do Estado (oito centésimas menos que en 2012).

Décimo oitava. Diminúen en computo anual ó fin de 2013 as afiliacións á Seguridade Social no colectivo das mulleres en 4.193 cotizantes, se ben estas pasan a representar en decembro do citado ano o 48,33% do total dos afiliados/as en Galicia.

Décimo novena. Da formación de demanda dirixida á poboación ocupada en Galicia beneficiáronse 173.282 empresas. Os maiores porcentaxes repiten un patrón similar o do exercicio do 2012, e danse entre catro grupos de empresas, no seguinte orden: nas empresas de 10 a 49 traballadores; nas pequenas empresas de 1 a 5 traballadores; nas de máis de 4.999 asalariados, e nas de intervalos entre 1.000 a 4.999 traballadores.

Na devandita formación participaron un total de 173.282 persoas, 3.447 máis co exercicio do ano anterior. Advírtese neste grupo un incremento da porcentaxe de mulleres participantes, pese a seguir sendo menor que o dos homes: do total de participantes, 100.843 (58%) son homes, mentres que 72.439 (42%) son mulleres. A maior porcentaxe de participantes concéntrase nos dous grupos de idade de entre 36 a 45 anos en ambos sexos.

Respecto aos contidos formativos con maior número de participantes, destaca que “Prevención de riscos laborais en xeral” concentra un ano mais o maior número,

38.378 (22,15%), mentres que as dúas seguintes accións de maior número de formados son a “Xestión de Recursos Humanos” (7,96%) e “Seguridade Alimentaria” (6,72%). Sube con forza a opción de “Informática nivel usuario” como quinta opción máis seguida cando no exercicio anterior nin sequera estaba entre as vinte primeiras.

Vixésima. Mantense a tendencia decrecente na siniestralidade laboral dos últimos anos. En Galicia o total de accidentes en xornada de traballo experimentou un descenso do 5,41%, aínda que se aprecia un incremento nos accidentes mortais. Na clasificación por actividades económicas dos accidentes, o comercio e a construción nas súas diversas modalidades, son as actividades que máis siniestralidade rexistran.

Vixésimo primeira. Galicia, no total de accidentes, está na media do índice de incidencia estatal, tendo sete Comunidades maior índice de incidencia. No que se refire ao índice de incidencia correspondente ós accidentes mortais, Galicia ocupa o terceiro lugar das Comunidades, aínda que cun índice que está máis de 2 puntos por enriba da media estatal. Na evolución destes índices en Galicia, obsérvase unha diminución en relación cos anos anteriores.

Vixésimo segunda. O número de convenios colectivos que existen en Galicia a 31 de decembro de 2013, xa sexan vixentes ou prorrogados tacitamente, é de 860, dos cales 122 son de sector e 738 de empresa. Asináronse por primeira vez este ano 23 novos convenios (todos de empresa), oito na Coruña, catro en Lugo, dous en Ourense, sete en Pontevedra e dous son de ámbito autonómico.

Vixésimo terceira. O incremento salarial pactado nos convenios colectivos asinados e revisados en 2013 foi do 0,57%, o incremento máis baixo desde que hai rexistros no Consello Galego de Relacións Laborais. Esta media é lixeiramente superior ao IPC galego deste ano, que foi do 0,5%, e tamén ao estatal, que foi do 0,3%.

O 18,46% dos convenios asinados, e o 23,08% dos revisados recollen cláusulas de revisión salarial. O 71,28% dos convenios asinados este ano recollen cláusulas respecto da ultraactividade. Nos convenios de sector a porcentaxe de convenios con pacto de ultraactividade é do 87,80% e nos de empresa do 66,88%.

En materia de xornada, a media pactada no ano 2013 foi de 1.767,46 horas, sendo máis reducida nos convenios de empresa (1.735,54 horas) fronte aos de sector (1.769,52 horas). Son 132 convenios colectivos (o 67,69% dos asinados este ano) os que indican unha xornada inferior á máxima legal (30 de sector e 102 de empresa).

Vixésimo cuarta. Rexistráronse en 2013 en Galicia 180 inaplicacións de convenio, 61 en 2012, que afectan a 4.166 persoas traballadoras, das que 2.763 son homes e 1.403 mulleres.

Respecto das condicións de traballo que se inaplican, no 96,11% refírense á contía salarial, sendo dentro destas a redución do salario a que máis se produce (72,78%).

No 73,9% das inaplicacións rexistradas a composición da comisión negociadora correspóndese co establecido no artigo 41 do Estatuto dos traballadores (comisión dun máximo de tres membros integrada por persoas traballadoras da propia empresa e elixida por estas democraticamente). No 25,6% está constituída pola representación legal dos traballadores/as.

Vixésimo quinta. Con datos do Ministerio de Emprego e Seguridade Social, a conflitividade laboral sigue aumentando neste ano, xa que, segundo criterios de repercusión, as folgas seguen a experimentar un claro incremento en relación co ano anterior, dato que se aprecia no aumento no seu número, persoas traballadoras participantes, e xornadas non traballadas.

Vixésimo sexta. Os expedientes de regulación de emprego diminúen sensiblemente este ano, tanto o seu número como o número de persoas traballadoras afectadas, feito que se produce na case totalidade das Comunidades Autónomas. No ano 2013 houbo 113 procedementos de carácter extintivo, 852 procedementos de carácter suspensivo e 953 procedementos de redución de xornada. Estes procedementos afectaron a 1.906, 12.899 e 5.446 persoas traballadoras, respectivamente.

Vixésimo sétima. O número de persoas perceptoras en Galicia da prestación económica de desemprego sitúase en media anual do 2013 en 155.400 (un 57,3% do total de persoas rexistradas no Servizo Público de Emprego), cunha diminución dun 2,04% con respecto o ano anterior, e supoñen o 5,42% do total estatal. Case a metade das persoas perceptoras da Comunidade Autónoma o son dunha prestación asistencial (subsídio ou renda activa de inserción).

Vixésimo oitava. Os preto de 998.000 beneficiarios/as do conxunto de prestacións sociais en Galicia supoñen o 35,86% do total da poboación, porcentaxe que é 6,67 puntos máis elevada co correspondente o total do Estado. O importe mensual destas prestacións: 696,5 millóns de euros, en decembro de 2013, que representan en Galicia unha contía de 250,4 euros por persoa beneficiaria.

Vixésimo novena. Analizando os resultados dos procesos electorais en Galicia durante o período de catro anos e tendo en conta os representantes con mandato en vigor a 31 de decembro de 2013, segundo a data de rexistro das actas, a central sindical UGT, con 29,84% do total, é a que obtivo maior número de representantes (5.364), seguida de CCOO e CIG con 28,74% e 26,76%, respectivamente (5.166 e 4.811 representantes), acadando un total de 2.637 o resto de sindicatos e grupos de persoas traballadoras cun 14,67%. No período que vai do 1 de xaneiro de 2010 ao 31 de decembro de 2013 a porcentaxe de participación das persoas traballadoras foi dun 72,61%.